

曾忠襄公書札

曾忠襄公書札

卷之十四目錄

復卓黼侯

復朱西山

復張觀準

致王霞舉

復裕壽帥

復周篠塘

復江蓉舫

復江蓉舫

復閻丹初

復閻丹初

復丁雨生中丞

致董醞卿

致張建侯

復王杏樵

復江蓉舫

復閻丹初

復閻丹初

復閻丹初

致劉南雲

復李靜山

致各府廳州公函

復李中堂

致沈幼帥

復江蓉舫

致李中堂

致吳子健中丞

復沈幼帥

復黃沛階

復唐泉伯

復吳健帥

致李捷帥

復長鶴亭

復李申夫方伯

復衛莊游

復丁稚帥

復李中堂

復劉毅帥

復畢東河

復江磬舫

復葆芝岑方伯

復江磬舫

歸公書札卷十四

復卓輔侯

頃展月之初六日惠函誦悉種切提撥什貼局費四萬兩尊處
已於初八日委員管解啟程至爲欣慰芝岑方伯與蓉舫觀察
函商擬將照此四萬兩兒交樹軍其時蓋未知已起解也今旣
惠解卽以之兌存省城甚好現因裁撤樹軍步隊三旂勇夫急
須找發欠餉應請閣下與蓉舫觀察面商另於存款二十萬兩
內兌解張軍門行營查收作爲找發飭裁步隊三旂勇夫欠餉
是所禱切至該軍欠餉如四萬兩不敷並請閣下面商蓉翁詢
問建侯軍門尙須找解若干或將擬解平陽運局之二萬兩惠

兒張軍門或於現存鹽課項下儘數兒撥除找給飭裁勇夫五月十五日以前欠餉外其該營酌畱馬步勇丁千餘人正餉亦宜兒發一兩箇月以恤兵艱承示道庫約存銀數具徵整頓苦心莫名欽佩本年京協各餉前以捐例停止賑費無出抵支之款奏明在於本年地丁及鹽課項下動用幸荷
諒允是上忙京餉現在無須備解若西徵協餉昨准部咨亦令緩至下忙後再行補解既由此道護符此後但有到運迫索協餉者悉可據此搪塞其甯夏五千兩或緩交或急交均請閣下與督撫商定斟酌爲之非區區者尙存其吝竇恐此端一開反招無限責望諸希查照辦理是幸刻下荒旱之象已成八九道庫存款將來

如何動用之處想瞽翁必能爲本省畱一綫生路當有函寄弟
與方伯熟籌議定然後施行耳

復朱西山

弟厯碌如恒毫無淑狀省南雖沾甘澍而值此久旱之餘非得
寸得分所能含潤近省一帶則自春徂夏雨澤常稀赤地連疇
農夫輒耕而歎愁慘情況耳不忍聞疇次祈求業已靡神不舉
奈仰天呼籲靈應寂然所可異者偶布陰雲狂風卽怒奔而至
迨雲開日出風亦旋停豈刦數之未盡歟蓋官吏之失職也抑
思窮通遞嬗天道之常靈茲子遺夫亦可以轉旋矣官吏失職
咎有攸歸民也何幸何一蹶而不使復振耶忝撫斯土隱憾無

窮知我愛我尙其有以教之幸甚幸甚尊體業已復元否我輩身體孱弱全以調養爲功弟自客臘至今藥物未嘗稍間然猶一經勞瘁全體不舒况載道星輶終朝僕僕所望隨時珍衛稍自節勞是所禱切

復張觀準

接誦副箋並清冊等件祇悉種切官捐一冊旣荷費神照章核定均屬與例相符已轉飭捐輸局將例銀數目逐款查明如式填註至商捐各冊中有合例者亦卽照辦所請監生從九銜兩項部章不准山右報捐應一併改爲未入職銜按較銀數有贏無絀自毋庸再爲刪減統由捐輸局查照成式另造妥冊限十

日內詳送以憑分別奏咨給獎另有與例不符者暫行開除隨後再爲改獎現在賑捐一案已准部議展緩三月縱往返咨商亦不致有逾定限請俟該局詳覆後再飛速布聞以便知會各行斟酌改定以慰其急公好義之忱承寄到部飯照費銀壹百貳拾餘兩亦已飭交局中隨冊送部堪釋錦系月之初九澍雨三時約有五寸續又連日滂沱或一二三寸不等遠近一律霑渥據各縣馳報卽最少處亦得二三四寸秋禾均可布種大祲之後有此轉機似天意已回刦數已盡誠珂鄉億兆之福莫非裔叢所賜也

致王霞舉

弟自愧疏庸忝膺艱鉅公私交困隕越堪虞日前幸獲甘霖普
霑閣境天心既轉霓望頓蘇誠珂鄉億兆之福也前因貴省家
少藏書人多廢學遂於省垣奏設書局訪求善本招募工人先
將各部經書次第刊布以惠士林旣念貴省通志一書自雍正
以後竟未重修將使百數十年文献無徵關繫猶鉅爰博採眾
議廣勸富紳勉湊多貲其襄盛舉特此書總纂一席必得宏通
淹雅之才始當制作如經之目惟閣下望重儒林功深學海一
時僉論莫不交推第恐娛意林泉不屑勞神翰墨茲特轉求丹
翁星使代爲勸駕務祈垂念通志一書實爲鄉邦要典一時著
述千古流傳蓋與國史相輔而行固非閣下莫當其任諒肯

慨然攬轡以總其成至於分任纂修亦必詞壇耆宿閣下青目所及不乏素心之人尙求示以所知或卽邀與俱至必待閣下一言然後敢請也近來士氣少衰文風頗替振興之責雖在有司而書院山長能得其人則轉移倍捷如蒙閣下肯兼掌教使晉陽多士咸沾化雨長坐春風將見桑梓之間菁莪蔚起當亦閣下之願猶爲守土之榮立俟德音易勝翹盼

復裕壽帥

端午日疊奉兩次環雲欣誦再三如親光澤晉省春夏之間又形暎旱日事虔禱始於前月底連獲驟雨雖有時電雷交作但不踰刻卽止遠近未能一律優渥正切焦盼初八夜濃雲四布

初九早雨勢沛然遙望雲氣甚厚霑潤必廣如天之福遐邇普
形深透則東作雖妨西成幸猶可望今歲民間鑒於頻年之食
之苦爭務回糧而商賈見災象已成猶欲藉此爲居奇之計儲
積甚富所以目前二麥失收而糧價不能陡漲今得此雨人心
愈安默揣情形暑月當可停賑此則商靈所賜也回憶辦災以
來首尾三年之久所費賑款不可勝計向非尊處暨諸鄰封始
終周卹尙安能支至今日而閣下軫念窮陬每於涸轍之呼不
待己力有餘無不委曲以應在弟與此地羣黎固已並受其福
而公猶自視欣然古之所以天下爲己任者亦如是耳心寫心藏
胡能自己

復周筱塘

昨因端節肅奉賀箋計登籤掌月之望曰接奉手書備承拳注
感何可任晉省亢旱既久二麥業已歉收幸昨初九日得澤約
有五寸續又連霑甘澍省垣左近頗形深透外郡則自一寸以
至五寸不等雖未能一律優渥秋禾似皆可種但求以後更無
乾澆之患使晚穀豐收猶可藉資補救正未知天意如何耳刻
下辦理招墾事宜並籌發籽種採買耕牛皆急不可緩之務無
如需費甚鉅又值蘿掘已空使人無從措手展捐一節從前原
有此意徒以事關大局未敢率抒己見遂勉強中止今當此水
盡山窮之日眞覺無策可施方切焦愁適披來翰始知朝內諸

公早已體恤及此因思絕處求生惟有此舉計不獲已謹具摺
籲懇天恩求許展捐半年倘蒙俞允此地子黎庶有再生
之慶否則亦惟坐視其溝壑而已茲並致函韞卿司農懇其從
中斡旋俾允所請如果得當則閣下暗中功德誠無涯涘銜結
何窮至廣學額一層亦如尊議附片具奏未知能邀議准否責
同鄉潘孝廉來澤賑濟實爲非常義舉已飛飭該處地方官妥
爲照料矣

復江蓉舫

頃奉月之十九日惠函誦悉種切河東鹽課庫存二十萬兩除
撥兌樹軍欠餉及帳房墊款約計總在八萬以外下剩之十二

萬金昨商同芝岑方伯已悉數提解司庫歸還各商號所借運費亦好借好還之意愿蒙鑒照甯夏協款五千若照晉省奏案卽涓滴皆可延緩因恐黼侯業經應允故不肯作十成決定之詞茲承函示情形自以放給爲是惟此後倘有援以爲請者則不得不婉言謝之矣至鹽務光景疲乏若此毋論五六七八等月向係停運之期卽使道乾腳旺而圍牆坍塌查禁難周澆曬無人鹽於何出此後課項之能否集成巨款全仗閣下以人事而補天時之窮萬勿因會逢其適稍弛邁往之念至盼至禱蒲解麥收據聞亦極減色不知開徵後民情奚若尚不以納糧爲苦否平陽以北則旱象已成無可救藥如得雨迅速猶可補種

晚秋若再無沛然之應則通省膏腴之產悉成不毛之區民何以爲生脈何以爲繼真令人愁腸百結也兩年災脈之役極賴勸襄其間幸免隕越今則事機倍難於前精力亦減於昔倘有更借一箸之籌無惜密函惠示並所企切再運城糧價較省爲賤倘再不雨一經平汾搬運亦勢將陡漲矣

復江蓉舫

頃接上月二十六日惠函誦盼種切通省澍澤普沾秋禾均已補種適日暑濕上騰釀雨猶易二十七及初三又復大雨傾注及外間報雨者亦無日無之所盼積雨之後口外大蛇太一帶蝗孽不能飛騰滋長致爲秋稼之害則大幸矣平陸螟蟲偏地

所關亦鉅昨已諫請閣下派員赴平趕緊撲捕弗知能迅速嚴
事否洪洞一縣無雨殊爲可異未知二十七日之雨彼處能否
霑足善後之舉大端不出墳倉穀以固根本清荒地以恤民困
勸屯墾以復本業於清荒地之中使之分別老荒新荒及地雖
有主無力耕作三種以便將錢糧辦理蠲緩於勸墾之中代爲
採買耕牛又以賣牛之錢散給無力耕作之戶使之謀及農具
籽種其有聞風歆羨情願受屬墾荒者亦量給農具籽種錢文
並免三年租賦以示體恤而廣招徠近與方伯粗定條款曰內
卽派員出省核實查辦或卽責成本管府州督率辦理弟又復
切實減致府廳直隸州逐條籌辦未識數月之內果能一一就

緒否前籌二十萬牛價花費一切在內恐尙不能足一萬頭之數以之分散災區仍恐無濟於事所希冀放手一辦者惟請展賑捐一疏果能仰邀恩允凡此應辦事端猶可稍有憑藉倘竟不諧則亦非弟所敢知矣俟奉批迴當卽飛函相告求緩京餉之詳刻已敘奏大約初十日可以拜發協款雖非正文似亦應連類而及否則避債無符彼此不堪其擾尊慮緻密之至存剩賑糧均已散竣甚慰甚慰安邑旣有星使批案辦理未能劃一亦姑置之而已上忙十五開徵後各處均不踊躍一則荒後錢艱一則意在觀望破其迷惑而恤其隱情此種解人實不易索過村窩匪已成積慣平燬亦是正辦第其中亦不無良善

之戶爲賊所脅制不敢鳴官致累及其身家若因噎而併懲之令其一椽靡託似亦非吾輩庇民之意此應切詢馬牧李令果該村無一善良之戶卽當平燬如不盡然令其舉報村正數人互相保結此後再有匪類潛匿卽惟村正是問然此弟遙度之詞閣下近在左右應寬應猛一切必有斟酌曹北池卽令張福茂勒限交案夏貴五等應責令恩守趕緊緝報楊占辛暫押對供均如尊指辦理廓爾喀差使向來取道豫境而總咨會晉省一體預備或者此次仍循舊道藉免供應之累弟處並未奏請改道也另示昨提同善堂存款八萬業經發交馬牧查買牛之舉固屬緊要惟其中既有星使歸還公費銀一萬九千兩且有

存備植桑積穀之議似斷不應動撥蓋當其辦文提銀之時祇知此八萬兩爲平耀存款絕不知有星使退還公費在內更不知將來尙有擬辦善舉致有此誤刻既知之應請閣下仍於庫鹽課項下撥出銀一萬九千兩歸還前款將來星使擬辦何事聽候示悉萬不便以他人應得之款我輩攘以辦事想高明當亦以爲然也星使咨來奏稿二件一謝病一條陳差徭其函述之詞亦無他語閣下所聞不識確否

復閻丹初

二十日遞二十六號信諒蒙察二十三日接奉第十二號手教諭悉種種國荃早歲戎旃備常艱苦自念積瘁之身分甘長

林豐草無當一割之用乃朝命敦迫再綰疆符抵晉以來迭遭奇旱雖請帑請粟立奉恩俞告貸告捐羣情奔赴而當計畫未定繞室彷徨解款不來望穿老眼函牘如蝟頭緒若絲以一人之精力兩載以來靡有朝夕在智能或綽有餘裕如弟疲茶亦笑以云此朝鏡鑷髮暮藥量水狀心銷歇漸成老醜蓋有不期然而然者矣辱公用肝膈之愛策勵之詞非不欲强自寬譬勉副厚望無如沴戾之氣蘊蓄已深旱暵之憂端緒早現旣難任其自然實無餘勇可賈將欲借資民力則閭閻並無藏富之區將再呼籲隣疆則禮經早有竭歡之戒縱或奏展賑捐事例無論機括利鈍多寡殊不敢必而相距道遠不克供我取攜猶

有後難爲繼之懼我公燭見萬里以弟苦思焦慮而不能得者
公必別有神解開我矇昧務求賜函指示俾有持循晉民幸甚
大局幸甚諸謹條復

一榮河虞鄉夏縣三處駢跔差徭在民間受病如此之深自應
變通釐章以示體恤夏虞從前聚眾滋事之案弟亦略有所聞
惟夏縣所謂紅丁白丁者非我公言及則竟不知之大約差規
各因其宣祇取便民不准中飽虞鄉則以明定差道爲急紓其
支應之累榮河則以分別糧差爲急紓其紛糾之累夏縣則以
清理丁銀爲急紓其偏枯之累均請我公就近主持辦理是所
翹切至虞鄉通稟尙未接到然以蕞爾一邑之事致煩椽筆爲

之起草則一應經畫必能起草野之呻吟垂經久之至計與考
亭社倉之法推行各路流傳方來爲古今有數文字正不獨虞
邑蒙福已也俟稟到之日卽行局通飭遵辦榮河之事旣經馬
令商定辦法當亦卽可具稟夏縣龍令玩泄如此我公僅予撤
省已屬仁厚之至將來到省弟再詳悉察看黃令明白曉事爲
現今不易之才旣於糧差利弊尙能究心已商同芝岑方伯卽
令代理夏篆俾竟全功總之用人行政吾輩權衡惟在詳審其
是而已語云不逆詐不億不信弟亦云不逆私不億不肖不分
官民不分正異官得其養自無扞格之虞民給所求定有遊泳
之樂惟當與我公靜養潭魚力除害馬藉挽浩刦於萬一其弟

所不知不聞者仍求隨時指示爲幸
一同善堂報銷不必急急造報弟意尙欲我公於清燕之暇別
籌拯救之術此等瑣瑣不直溷公神智

一太汾平潞霍隰皆無透雨平遼忻代亦然雁門以北十四日
又有報雨州縣十數處然亦不甚優渥惟口外則有八九寸光
景種秋已極餘裕麥收大約蒲解爲最絳州次之澤郡又次之
餘則不堪言狀至概免民欠銀穀一案早經通飭示遵但尙未
具奏耳

一吳柳堂條奏之件昨日已奉 諭旨在廷諸公諸有所論因
未鈔發不能深悉底蘊吳公則以五品官議卽尙不沒其以身

建言之隱前已將邸抄另錄呈覽矣川案則遲至許久猶未奏
結恐亦以案情太巨不得不慎之又慎耳省門二十二日午後
雷雨一陣不成分寸近日各神水均已奉迎到省而竭誠申禱
亢旱依然瞻仰 穩蒼且悚且懼

復閻丹初

初六曰遞二十九號信計尚在途適盧委員等於初八日到省
賚奉十四號惠函河東麥收已竣聞蒲猶勝於解二十八得雨
以後秋禾一律布種不勝欣慰方以汾太霍隰爲憂幸初九日
自寅訖辰始猶淅瀝嗣則傾注如瀉簷溜有聲大約入土約有
四五寸之譜下午陰雨四合餘意未已他處想亦得雨似此情

形或者所沾甚普當不僅附省州縣擬卽恭摺奏聞上慰宸
念並以馳告執事稍解煩襟至續賑之事除展賑捐一法亦苦
計無所出貽山觀察前有書來亦曾道及於此比以枯旱方始
局面廣狹莫定欲稍遲再行定計若陝省捐事謂已展至九月
或許專指獎冊而言如奏請展捐則文卿中丞致函弟處必已
道及矣請公亦照此意裁答原函附繳希察收爲幸榮虞夏三
縣詳稟及尊批均已備悉龍令示倣以勵其餘此正我公化裁
通變微意有識者所能共諒至一應徭役以有定之限取之於
民無定之利歸之於官天理人情古今不易公猶以未能盡善
爲歉盛懷謙抑眞汪洋千頃矣靈石差徭之有累行旅弟早有

所聞蓋彼處里民向亦攤錢繳官不問車馬之有無不管流差
之多寡聽官自爲雇覈自爲應付盈縮均所弗計而地方官遂
以此項爲入款乃設車驛柜以取往來車馬之津貼定官價以
支南北之流差拉牲口以苦上下之行旅暴橫之由大致如此
故弟前函有車馬或仍局雇或仍票傳價值仍歸局發仍歸局
銷蓋卽懼流弊爲靈石之續不知有當尊意否通飭之說我公
所論妙極其微當告知方伯詳慎定計免得圓柄方鑿轉致無
益而多損也南運保案大疏與兩片稿語語樸實字字斟酌具
見我公於鼓舞羣倫之中寓慎重名器之意紉佩無量惟王守
恭梁殿象二員或係附增或係廩貢均望詢明改注定以下月

初出奏緣此月截停捐案獎奏過多且尊稿尙有改註之處亦恐趕辦不及天下中材多而上質少如公所言仍是尋常之品至力爲循良肩除積弊目前固無此選亦實爲風氣律例所束縛而不化之故習染者漸受病已深公言難除蓋有深慨東鄉案尙無明文吳疏之後繼以寶廷張之洞諸賢互有闡發清議尙不落寞國家之事一壞於道光間之破觚爲圓再誤於和戎之局致有金田亂民毒逋天下馴至今日元氣愈虧國勢愈弱雖善者亦祇能紓徐委蛇與之爲無町畦而不敢發難以爭無定之勝負公函歸獄於文恪遺奏之不顯眞長沙太息流涕旨趣敬服敬服

復丁雨生中丞

頃誦琅緘恍同面晤此間辦賑前後將近三年糜費之款數近
千萬在朝廷則發帑截漕恩施疊沛在隣省則勸捐協餉
情誼兼隆且上自官紳下而商庶以至閨閣之中幅員之外莫
不傾貲以湊直竭天下之力以救一方之苦亘古以來罕聞此
事乃饑黎五百餘萬其得全活至今者猶不及什之三四向使
籌辦得宜或不至此思之每呼負負辱承獎藉何以克當想執
事特阿其所好耳愧甚感甚另接大牘示知張壽泉觀察籌辦
捐款勞績懋著實非尋常勸捐可比自應奏請特恩藉資鼓
勵容卽催請合肥相國主稿並將尊處彙開各員分別會銜具

奏以歸畫一至應得外獎十餘人擬載入志書之處非閣下與人爲善之誠見不及此亦當遵諭速行會奏用副雅意惟原示鈔稿一件並未遞到或係緘封時偶爾遺漏未及粘附牘尾仍祈飭書另行鈔寄爲荷晉省自春入夏又成暵旱百計禳禱至前月底始連獲驟雨然亦霑潤不廣此刻麥秋已無可望所恃者晚穫而已亦非再邀渥澤不可似此情形賑務竟無告停之日豈斯民刦數未盡耶抑撫斯土者實貽之咎歟朝夕彷徨殊深憂灼閭下饑溺之量代切焦勞必肯出其緒餘早以良策見畀海天在望金玉毋遐無任企矚之至

致董醞卿

晉省春夏之間又形亢旱以致三農坐困二麥失收幸自本月初九日以後疊霑渥澤省垣左近似已深透外郡亦報得三五寸不等晚禾似皆可種但求此後陽雨應時使秋稼占豐猶可藉資補救然未識天意如何刻下因民間荒地甚多正辦理招墾事宜並籌發籽種採買耕牛皆急不可緩之務墾還倉穀以備後患約計需費甚鉅深苦無從羅掘前此漕運業已力竭筋疲搜羅罄淨此時各省尾捐數本無幾將次解清欲再求涓滴來源更不可得真令人有束手之勢當停捐之始卽知晉省情形萬不能支意欲疏求展限第以事關大局未敢率憑已見致拂宸衷因而中止今處此山窮水盡之日朝夕籌思舍此別

無奇策不揣冒昧謹具摺籲懇天恩暫求展捐半年在朝
廷賑卹災黎有加無已必蒙曲賜俞允但慮格於眾議事或
不行如是則子遺之民雖有生機仍無生路而數年賑務終貽
一簣之虧能無深懼仰荷痼瘼在抱饑溺爲懷固無日不以晉
災爲念今億萬生命繫於此舉惟乞我公佛力從中斡旋俾得
倖如所請不獨三晉士民邀恩再造卽以後二十年守斯土者
亦藉免隕越之虞銜泐何極

致張建侯

昨因貴弁回營之便附寄久誦延年一千二百本到日卽祈分
給傳諭弁勇希冀識字者人人誦習啟其向善之機是爲致禱

綠營兵餉久未散放深念枵腹之兵難期振作茲與芝零方伯商量司庫本屬支絀而欲期戎行整肅以爲有備之計不得不寓體恤於訓練之中現已將去歲夏秋二季餉項竭力設措想卽轉飭各營迅卽派員赴司具文請領按季散放庶營兵得茲二季之餉藉資鼓勵營伍可以加意整頓明年辦理軍政大可觀也

復王杏樵

頃奉手函卽諭安抵都門聲蜚曰下至符頌念蒲解一帶春雨偏得數次故麥收略爲減成絕非顆粒不收之比目下運成糧價大減卽其明證以麥收而論解不如蒲絳不如解平霍汾太

則每况愈下無足數矣上月之杪河東又得雨三四寸秋禾悉已普種惟省城枯旱異常勢將束手幸於初九日自寅迄辰澍雨三時之久大約入土四五寸之譜遠望陰雲四合濕氣甚重似省外地方均可一律普沾詢之農民據言補種雜糧尙不嫌遲惟盼伏雨接續便可有秋既爲三晉遺黎喜有更生之慶亦爲丹老與鄙人自慰也賤恙自冬徂春迄未調理復元而步履仍舊軟弱兩足趾瘡癆時發時愈固由濕氣下注亦總因氣血之虧以私情而論息影盤桓亦因其分以晉事而論縱可不謀續賑而善後諸端猶屬毫無頭緒重蒙厚勗惟當以一身之精力定此席之去畱斷不肯避難鳴高亦不敢戀官速謗以求無

負於晉民因閭下詞旨懇切聊布乃懷以資質證諸希鑒察是幸

復江蓉舫

頃奉月之初九曰環章誦聆種切承示河東兩澤糧價情形至爲欣慰惟荒地過多暗中收成已大有虧損元氣之復仍不知需幾何年若芮永之交村落無人致斷行旅似非縱火焚燒不可耕牛之苦缺乏當卽商同方伯籌備款項檄飭採買阿牧多購牛隻或裱散窮農或減價出售由局妥籌定計請勿繫念爲幸省垣自初九十一十五等日陸續得雨光景計已深透其平汾霍隰太原平定遼沁潞澤以及北之忻代或二十七八先已

得雨或初九同日得雨秋禾均可一律普種再有伏雨接續猶不失爲中稔之年惟天心難測我輩第虔修職守以俟大命而已續賑一節現在事機稍轉自無容以此煩慮然善後之端千條萬緒不爲一一區畫是救之於垂絕之頃棄之於甫甦之時關繫尤爲切要但萬事非錢不行總必款有可籌然後事乃可舉前以災象將成事機岌岌亦知發棠之請可再而不可三協撥之求可一而不可再及地方紳富縱或尚有餘力亦應稍令休息藉培地方元氣似若除卻展捐一法別無自善之策茲承借箸之籌兩心諸已相印惟同一求展與其注力賑捐勞而寡獲不如專展新捐藉以集事况側聞政府大農之議於晉賑停

捐一節頗能體量其難故曰內擬卽愷切疏陳倘邀
俞允則無論賑撫善後諸可略有憑藉否則寸鐵不持縱有至仁之言
亦無行仁之術卓見以爲然否前提運費十二萬金此時計已
陸續啟解至蒲解上忙啟徵後情形何如於司庫能有所益否
竊念晉省災民弟兩載以來雖不能一一援救然苦心積慮實
已煞費經營縱不我德當無我怨聚眾稱亂之事或者民猶無
所藉口第各牧令張弛緩急之宜尚須閣下就近代爲之迎導
耳得雨以後精神較爲爽然叨承厚囑謹當書紳函示各層採
買至爲明透分賑亦屬要言如不幸而有續賑之舉當與方伯
次第圖之嗣後機宜所在仍望隨時惠貺是所盼禱

復閻丹初

昨奉二十一號惠函祇承種切正在裁答間曹弁自運城回省再奉二十號手敎備承策勵殷拳至深慚感請展賑捐之奏昨准部咨業經議駁惟以善後事宜款無所出蒙撥經費五十萬兩內由農部奉發者二十萬由兩湖閩浙江安江蘇山東川廣十省共提銀三十萬兩就此三十萬兩而論其蘇浙閩廣四省所提舊欠協晉項下各銀三萬兩恐難如數全解中外併計將來實得之數至多亦不過三四十萬仰維朝廷體念災區之意固已無微弗至第勸墾一事頭項紛煩填倉大宗關繫緊要既須二者兼權卽不得不區分緩急查晉省被災以省南爲重

省南被災又以蒲解平絳爲重此項奉撥之款與其分給通省
而不足不如專顧災重之區或者所得較多荒蕪地畝可以迅
就墾復便收得寸得尺之利惟旣名之曰勸墾卽不得渾同賑
恤之款方與題旨符合聞上年弟處籌發籽種銀兩地方官但
就災民冊籍均勻分散每人所得不過百餘文是祇可謂之加
賑於籌發籽種本文毫無干涉如此次勸墾仍此之爲一則將
艱難帑項悉成虛擲一則荒蕪地畝依舊不治於國於民兩無
所益因思我公刻雖奏准解任養疴而饑溺之懷日榮方寸又
辦賑兩年民人感德官吏畏威斷不敢稍逾繩墨且久作晉南
寓公地利民情瞭若觀掌青衿胄子半係門牆倘得明公主持

其事必可有利無弊然使非金石至交亦不敢以此爲請非感公至誠血性亦不忍以此奉煩重以草昧經營關繫後來元氣用敢專緘叩懇如蒙明公燭計其大許爲屬任此端卽求酌定處所分派數目將來如何給領如何查核請公一手指示弟俟部款二十萬領到卽行解赴河東道庫聽候指撥如仍不敷弟卽再籌三二十萬金亦可想大儒自任天下之重必不肯以官場世俗之詞相拒也欽遲德教曷勝饑渴至瀘州所屬之蒲永大甯汾州所屬之鄉甯石樓遼州所屬之榆和澤州所屬之陽城沁州所屬之沁源霍州所屬之靈石皆係民貧地瘠之區應作何調劑勸墾之處當由弟處另行籌款辦理還倉一事乃備

水旱不時之需而在晉省產穀無多猶爲切要今既以朝廷特賞之項專辦省南勸墾則儲穀經費急切難籌然不爲之略舉端緒卽恐永無填還之日刻擬就賑捐尾款及鹽課項下先提銀二三十萬兩卽便撥給各府州發商生息俟豐稔之年由各屬分成買補一則逐漸歸還弗至穀價翔貴二則生息之款仍可歸入本地善後之用其餘缺額穀價或奏明截畱釐金十年或無論地丁徵收多寡每年截畱十萬兩專作填倉之費多以十年爲率少以五年爲率就被災動賑倉穀與所奏豁免以前民欠倉穀爲數不過百餘萬石以每石一兩計之五年以後規復可望就緒此通籌善後大段如此並求俯賜衡奪至盼至

禱清查荒地刻雖粗立科條派員催辦然因虛實真僞莫分故有將真正無人承領承佃之地造冊歸官聽候招佃之議惟有人無力暫時閑曠此等地畝以公現況例之實屬無能查核然與其利國無甯利民田賦經制上下之相蒙也久矣豈惟不可歸咎現今牧令卽得大賢爲之亦非一蹴所能奏効公言云云良有深嘅差徭一事昨弟有切致各府州一函亦不啻大聲疾呼未識能稍加體察力圖變計否太平節略已悉曲沃俟恩守稟復後當爲議奪虞鄉章程刊行有無審礙容與芝岑方伯商定辦理霞舉先生尙無回信旣荷允許當卽照議具關宏運書院遺席卽訂請楊種珊瑚明府已將尊意告知靜翁諸請終念爲

幸陳情之奏得 溫旨殷殷慰問而任勞任怨四字猶不媿公
生平恩重二使之不能體念災區大疏所陳彼亦無辭自解若
黨蜀之私自好者猶不之爲曾謂大賢爲之乎退還公費一萬
九千兩旣我公堅囑不令出奏僕亦未敢以小人之腹妄度君
子之心致負長者銷聲匿跡之素至銷差 批摺俟部行到日
當卽飭局通行崔劉二令均當留意發還保單三件及另緘中
應保四人又虞鄉創建書院一節諸當如命辦理若教佐營典
與請敘紳士紛紜無謂誠如尊示所云客商同總局諸公駁令
覆核平陸岷蟲之患聞已漸熄其大舍太地方蝻孽經湘勇捕
埋二十七八萬石之多似不至釀爲大患打狼之事又經檄飭

張軍門派將搜捕或許認真遵辦惟甘肅階州地震至陷學宮
官舍星變於上地動於下默念時局莫名悚惕

復閻丹初

初十日專弁赴運曾泐三十七號信恭候興居頃奉二十二號
手教並另示二件祇盼一切善後事宜以查荒爲最要亦以查
荒爲最難近來建議者亦多以清丈爲說固苦人財兩絀無能
爲役就令逐爲清丈而於有力無力有人無人亦無從區別徒
爲倣擾何益事實故雍正朝之不能丈地清糧與此時之不能
丈地清荒事理雖殊其不行則一也計爲責成各村紳耆核實
舉報一法雖知不免顛倒朦朧然有無主荒地實在無人承佃

卽令交官之議或者不至過踰規矩至何者爲老荒何者爲新荒何者爲有主無力之地均令將主名頃畝糧數分別開造清冊查清之後將來老荒如何請豁新荒與有主無力之地如何分別停徵並令地方官以此意示諭民人俾知受田以後先有三年不納租賦之利便可踴躍從事以上各節昨已刊定條款發交查荒委員遵照辦理此與公議之所同者謹將章程一冊附呈台覽本年省南州縣不調一人入簾北路亦僅調一人其已補定而未到任者近與方伯商定闡後悉令赴任亦卽我公專事責成之意至於分給勸墾之資弟前減亦以名爲勸墾卽不得混同賑恤致糜帑項爲慮茲讀來議謂應俟荒地查清

後其有受塵爲請者分別頃畝給予牛具籽種片言扼要令人欽佩之至其餘各條亦皆精實不刊客商同方伯廉訪卽行飭局刊發稅契過割一層昨磬舫來書亦深言其弊害第不取一文則州縣於額徵稅項不無藉口司尾向有領費若概不取值以盈千累萬之多州縣亦不能受此賠累然一言及需費則民人望而卻步終屬不可清理思維再四似宜別設一更名驗契公所無論遠年近年或典或賣契據凡未投稅者悉令呈驗均不准以偷漏論呈驗之後蓋用某州縣驗訖截記如此變通辦理使官民皆知呈驗地契係爲清糧更名而設與查稅絕不相蒙或可相安無事不卜尊意以爲然否前函奉求台端主持省

南勸墾銀兩數實以國荃未能周知民隱控縱一有不宜或貽
地方缺憾故欲待命而行求其是耳來教則謂國荃欲以長者
儕諸委員幕客之末僕雖鹵莽亦萬不忍出此前請自應遵作
罷論此後相約惟期誘我以善率我未能假有延訪仍求剖悉
開示俾有持循至禱至感所退公費一萬八千四百兩早經罄
舫撥存運庫似培植書院捐建義倉亦係切要之舉牛款尚可
他籌務請我公勿以煩慮爲幸菊圃太史現經振軒中丞奏調
赴粵振軒中丞亦布帛菽粟者菊圃或得行其道乎

復閩丹初

頃奉二十七號惠復知前泐各函均邀台察珂鄉輕徭積穀諸
曾忠襄公書札

卷十四

三

政經大賢親手釐定科條當各秩然就序不卜情事有與晉合
者否善後事宜紛如亂絲查辦一有不清卽爲異曰民慮如弟
見聞陋隘恒懼疏節闊目負此子黎重叨祓飾彌增顏汗尙幸
近依函丈不見鄙夷庶幾寡過之指免爲不肖之歸欽遲唾咳
曷勝跂禱諸謹布復

一買穀還倉之舉定意賤處多買貴處少買至貴處不買俾免
擡價居奇有礙民食大約關北及潞澤地方尚有糧價一兩以
內之處其餘多嫌價踊已批飭從緩至於科派抑勒諸弊實所
難保前經弟擬有數條由局嚴札通行未知能悉就範圍否
一北路牛馬撥解已將竣事惟平霍以上諸候玉山批解此月

倘可辦竣俾民間得以健驢藉謀生活弗至因喂養受累則幸甚矣

一差徭一事我公迭函痛切言之實如秦鏡溫犀無微弗照且事事爲官畱有餘地絕非強以所難不過杜絕丁役中飽而已查虞夏改章以後官民相安無事是可行已有明徵如以各該縣係屬小邑情形猶與衝煩驛跀有別今永濟試行新章亦無貽誤賠墊之累則通行亦必不至扞格我公前言太平曲沃爲甚昨已派員赴太澈底清查如果得有要領則曲沃等處皆可仿照爲之此心斷不令瘡痍之民重爲徭役所困尙希紓念爲幸

一芮城錢糧萬令於春間稟免上忙卽經批准入告嗣有平蒲絳解通徵一忙之奏卽近日所頒騰黃是也如該縣下忙不便啟徵萬令儘可據情再請原不必拘泥奏案若該縣默無一言弟與司局亦無憑請免是該縣下忙仍應由萬令切陳民情困苦再行彙奏毋須夾片更正惟因我公述及該縣民力萬分拮据慮及候稟候批候詳候奏過延時日已徑札該縣自行酌度如礙難徵收准其一面具詳請免一面出示停徵無須再候批示俾免擾累抑弟更有請者大祲之後民氣凋殘已極糧賦一事在膏腴之地且苦悉索不繼若災重瘠苦之地痛心疾首可知刻擬將永平處州等處州縣無論有人無人有

力無力酌量情形或統免三二年正賦或酌免三二年一忙以
培元氣而示休息免令枝枝節節爲之反致 廷意厭煩且滋
吏胥弊混至官用如有弗給其統免正賦之處擬每年由善後
局酌給辦公經費千二百兩俾有所養若徵收一忙者則略有
餘潤卽不議給津貼稍示區別其差徭攤派則老荒新荒及有
主無力者一概不准灑派庶流亡之眾弗至免於正供困於科
斂如公意亦以爲然除弟所指州縣尙有應添入者否其中何
者最重最難應免三年何者較輕較次應免二年何者祇減一
忙至津貼之款擬通年至少亦議給一千二百金按日計支是
否足用我公熟於官民情僞務求一二代爲核定弟卽痛切上

陳似能爲百姓稍畱有餘猶勝於升合之賑濟也伏求迅賜衡定以便商同稟方伯酌提此項辦公經費企切企切一鹽務現在情形已到萬窘之候計臣但知協撥緊要而不諒晉局艱難前准部行深爲灼慮昨磬舫書來情勢亦極迫切弟以同舟共濟萬無令伊獨任其難之理已許爲竭力頂奏望公就近寬慰其心切勿因此廢事頃又奉 寄諭催河東京餉亦不能不轉行磬舫也

致劉南雲

前接公牘當卽批發想達典鑑採購牛馬總以牛多馬少爲宜惟聞口外有菜牛一種不能耕作購之無益此類想販牛之人

皆能分別煩飭令分途採購各員專購耕牛至於菜牛一概不用隨購隨解務於中秋前後一律購齊分解省南各屬備種宿麥是爲至要大蛇太蝗蝻已經貴軍捕埋淨盡至爲欣慰附近各處有無蔓延之患尙祈飭弁搜查以靖餘孽刻下秋苗茂正值吐穗結實之時二十七八兩日并垣均連日得雨各屬如得普霑西成當可共慶豐稔惟前月十二日山陝川隴四省同日地震晉中不過略動片刻陝西有山崩橋斷之異城樓房屋亦有倒塌川省則山崩傾陷民房甚多而猶以甘肅階文爲甚石泉中丞來信連震半月不定此等異象實爲罕見又前月二十六日太白經天垂象示異天地示警如此能無危懼據省中

觀星象者云今年秦晉之交恐不能無蠢動雖未必其言之果
驗而綢繆未雨要不可不思患預防現在晉中緩急可恃惟貴
軍耳敬懇加意訓練務成勁旅以固北門鎖鑰並飭營哨等官
嚴密巡防潛消仄側圖維於無事之秋臨事庶免張皇有備之
道實在於此惟仁弟畱意焉

復李靜山

昨誦手函並玩課象藉悉種切天玉青囊之秘難得眞詮閣下
已識此中元竅則造化在手不特可遂安親之志並可以獨得
之傳公諸同人羣言聚訟一旦窺其奧妙盡破諸說眞大快事
竊謂理氣與形勢本合而爲一天玉青囊諸書爲地學家眞種

子特秘而不宣遂滋擬議耳或謂此書專爲水龍而言與山龍無涉者固非卽謂山用順水用逆者亦未悟其全旨蓋山水雖爲二氣其實一氣不能離陰陽爲二又何能分山水爲兩乎人徒執山上龍神不下水水裏龍神不上山之說是以地學眞諦始終未獲解人鄙意雌雄者卽陰陽之別名也山水者卽陰陽交媾之所由來也陽用陰應陰用陽朝自是鐵板註腳得其訣則無論山龍水龍均有把握見解旣眞眼力自的彼噬羅經爲無用者眞夢夢耳閣下於此中旣有心得則山川大地一覽了然虎踞潭諸山正欲一質高明承許往衡邑各山一覽實慰渴懷諸山有一是者否閱後祈以實告所占虎踞潭課象似吉如

證以法眼尙爲不差則立穴收氣之法均乞一一詳示是所至
禱承爲山西占雨已有明效大驗又承代占身命備辱拳注慙
感奚如晉民困於積歉獲有轉機則厚幸矣一身之利鈍固所
弗計也

致各府廳州公函

晉省迭遭大祲農民十室九空田地蒿萊滿目較之東南久被
兵燹者其情形猶爲慘酷現雖澍澤普沾秋禾均已補種倘有
伏雨接續或以豐熟之秋成抵補夏收之歉薄俾子黎藉謀旨
蓄而吾輩不患庚呼當亦仁賢所同爲企禱者也惟是災祲之
始以賑貸爲大端災祲之餘以撫綏爲首政故賑務莫難於善

後而善後莫要於墾荒查山西一省山多地少本非五穀蕃衍
之區如雁門迤北則地多斥鹵歲僅一收太行迤東則岡巒帶
土頗鮮平原其其推爲神皋奧區者亦祇太汾平蒲絳解數郡
土地平曠天氣稍爲濕煦而所屬州邑仍有界在山陲號稱嶢
嶢者是由地勢所迫初非人力可施溯自軍興以來晉中本無
甯歲昔則收成歉薄困於力役之無時今則大祲迭遭幾於人
類之將盡弟承乏此邦兩載以來雖力爲地方請 勅截漕勸
捐告貸幾以天下全力赴此一方之急無如災區過廣爲曰太
長雖有博濟之心苦乏彌綸之術以故道殣相望民卒流亡古
稱市塵闐寂雞犬罕音者方之今日不是過矣茲幸天心垂愛

歲事稍有轉機若不亟圖屯墾至計是已荒之地無日開闢未
荒之地馴至閑曠閭閻必因此而愈窮荒熟不清主名頃畝不得豁免無案計臣將起而議其後州縣必因此而愈累且歷時
過久詐僞曰滋有因荒難納之糧卽有非荒不完之賦國家
額設經賦亦且永無規復之望病國病民莫甚於此明知事端
煩重著手爲難然旣熟睹民間呻吟愁嘆情形任其水深火熱
而不亟圖拯救固吾人所不忍也因在己財力短絀遂欲遺大
投難於後來之賢但取苟且目前不爲大局長治久安之計亦
吾人所大懼也爲今之計所謂勸墾之要約亦不過數端一曰
清荒被災州縣通省十居其八然被災有輕重之殊地方有貧

富之別土壤有肥瘠之異所有荒地斷不能犁然一致應各就
地方情形責令紳耆公社人等逐村舉報必係地主死亡逃絕
而又非親族里甲人等所願承領者是曰新荒呈明之後開造
花名頃畝糧數清冊將地交官存案聽候招佃若因愛惜地力
種夏而不種秋今年種而明年不種者不得藉此牽混其有水
沖沙壓石積鹹廢賠糧之地非累在里甲卽累在州縣實不關
於此次旱災是曰老荒亦應由地方官責令紳耆人等查明具
報別爲一冊辦理不得混入新荒令其交地入官棄其本業固有不
可若等之爲熟地仍令納糧當差以重困瘡痍之民亦所難行

亦應由地方官於查明後別爲一冊辦理此清荒之說也一曰恤荒荒地區分三等旣已查悉清楚卽應代乞恩施俾得憲民之力盡地之利如考荒之地所有向來賠糧應由弟處彙案入告永遠豁免所有向來差攤卽由各州縣出示扣除毋令窶攤滋累其新荒之地概行停徵三年其有主無力之地概行停徵二年用示體恤而廣招徠此恤荒之說也一曰勸荒農民以耕作爲世業藉收穫爲衣食斷無蕪穢其田疇荒而不治之理所以忍令閒曠者蓋以饑饉餘生無力營幹當其啼饑之始或先貸其車牛繼且鬻其農具及腰鎌耒耜一文之可值者無不悉索以供其一飽今雖性命僅存而向之得一錢而棄者刻

則費百錢千錢而猶不營故不得不坐受困累若再不爲之所
所慮老者終爲溝壑之填壯者仍作逃亡之續竭此兩年心力
而令生存之民終不免於宛轉待斃則晉之爲晉此後尙堪問
乎昨於司庫暨河東道庫共提銀二十萬兩派員分赴陝豫及
口外地方採買耕牛限於七月內運到俾得趕種宿麥此牛到
後每頭約以十千出售庶中人之力猶可勉企所得之價卽以
散給有人有地無力耕作因而荒廢之戶使之自謀農具籽種
得以盡力隴畝弗至毫無憑藉應俟查明後卽以此意出示曉
諭毋任閭澠倘所買牛隻不敷再當籌款續買以化一爲兩之
錢行還定安集之政此勸荒之說也一曰招荒晉省人民業農

者少逐末者多此次大祲災重者農民或傷及七八或傷及五六輕者亦傷及三四再罹吉嵐岢臨永浮岳等州縣向來地畝多由棚民墾作被災以後亦有越河赴陝者亦有逃歸本籍者此項地糧能否胥歸有著斷難一律如其無著豁免三年之糧俾得稍沾餘潤代謀牛隻農具使之得所經營果可招之使徠乎如往者難復似此辦理能令遠方之民聞風歆羨乎抑平原曠衍易於復業岡巒嶢崿更有所難乎或舍弟現籌之外別有招徠切劑乎就數者之中以此層爲最切就所籌辦法以此層爲最難閣下身任地方責無旁貸務須逐條推究確定辦法或者生機日闢此後民間得以自通有無而返本業十年生聚十

年敎訓二十年以後元氣可以稍復乎至於未經歸併於地缺額之丁應令地方官設法歸併倘難全歸或實在地土瘠薄不堪歸併累民亦須切實查詢詳請奏豁特不可一味市恩要譽置國計於弗恤耳通省倉儲告竭水旱難保必無故還倉一事刻亦急欲舉辦應請閣下將各屬額設若干動用若干現在有無存穀開摺呈送以便通盤籌計酌定歸補成數用戒不虞徭役一事晉民受累已深現在皮骨僅存何忍更以無名供應脧其膏血應請閣下各就地方情形熟觀定計如弊之在吏役者差票是也弊之在紳董者浮開捏報是也弊之在里甲者浮收浮攤仍行挪用久而興訟是也弊之在差門者勾串勒折朦

官分肥是也弊之在驛站者借車借馬差信文移是也總斯數
弊實在於官無絲毫之利而蚩蚩者且受害無窮靡所控訴迨
刁生劣監從中煽惑於是而有京控之案於是而有聚眾之案
拖延日久訟費愈煩良者曰累強者曰刁吏治不綱大率由此
務請閣下勤求其隱祛其太甚亦大祲之後休養生息之一要
也

復李中堂

頃奉月之初七日手示祇承種切辦捐人員不准再請獎勵此
間昨日接准部行正在籌思無策以晉省頻遭大祲所有賑運
諸費全恃一綫捐輸藉資接濟在收解本無所贏其勤劬亦何

可沒若因捐例現停將各該員一片救焚拯溺苦心概謂無足
採錄是吾輩徒有要約之言而異時難爲緩急之應公言烏盡
弓藏者良有深慨諭令敝處卽日切實疏陳凡此項勸捐出力
人員仍照海運河工章程敘獎俾已請者弗至議駁未請者猶
可續開具見關懷極切展捐之舉蒙 交部議側聞祇准展辦
封典職銜兩項另撥帑銀五十萬俾充善後經費仰維 高厚
天恩實屬向來未有但以還倉一項計之所費卽需百數十萬
其墾荒招佃牛具籽種尙不在此數內封職兩項集款斷不能
多僅憑此五十萬發款專作勸墾之資所需弗給專備墳倉之
費所欠亦多若兩者兼權又慮一無所就是有此准而不准之

議反致辦理棘手未審執事何以策之丹老於上月十七日拜
摺後卽赴解梁講席此老近來精力亦大疲茶恐無復出而問
世之意正定疏防之案許歸外結感謝靡涯

致沈幼帥

晉省連歲遭逢大祲情勢岌岌至不可支仰賴朝廷發帑截
漕各仁隣勸捐湊賑源源協濟直以天下全力救此一方之急
在饑饉遺黎感叨存活弟亦藉手告成幸免墮越微管之嘆殆
與三晉士民詠蹈無極豈直望雲九頓已耶現在澍雨應時秋
禾長發均極茂如果雨水不缺收成或有可觀第頻年荒歉
農民流亡過多以致田地荒蕪未能一律墾作及幸而皮骨僅

存牛具籽種一無所有遂一坐荒歲月不能返其本業若不亟爲之所是已荒之地未由開闢未荒之地日漸閑曠病國病民莫甚於此故目前善後之要莫切於清查荒地爲之蠲緩租賦徭役以恤其困再爲之採買耕牛購備農具籽種務令得所憑藉庶幾生存之民猶可盡力耕作逃亡之戶可以聞風歸來及隣省邊氓農隸咸知有利可圖爭以受廛爲請此後生機日闢民間得以自通有無而謀衣食之利二十年以後元氣可稍復乎所苦者比歲阻饑賦稅無出公家本無一金之儲紳商人等傾家湊賑閭閻已有不貲之累今欲墾荒招佃籌辦牛具籽種經費再四思維實屬無可羅掘萬不獲已因有懇展賑捐半年

之奏茲准部行展捐一事當此功令維新之際未便遽如所請但以晉省荒後情形勸墾諸端關係至爲緊要因有撥給善後經費五十萬兩之議天恩浩蕩曠古難逢屬在身受能毋感泣查此項撥款五十萬除去在部奉發銀二十萬兩外其餘三十萬兩統係指實的款由貴處與各省分別解晉俾應切需等語伏念山西賑務兩載以來頻呼將伯且仁心仁術凡有罅隙可乘無不竭力營辦今天心幸轉何敢仍以在己之難再作竭情之請是以晝後之款直欲出自展捐弗忍更言協濟一則艱窘之情素所共諒二則無厭之瀆未可囁嚅固不待函商之詞先已知其不可但廷旨不主於捐而主於協弟亦無能再

計惟有叩懇台端俯念晉省更生之民有地而不能耕作有食
而不能自謀展轉溝壑仍苦同歸於盡棄以前援救之勞釀後
來凋殘之局想仁賢痛癢在抱必爲惻然深念務望函到以後
迅速飭司設法籌解俾弟得以派員續買耕牛分散災重之區
便可趕種二麥緣晉南農民全貲夏收此項協款早到一日爲
農民計多種一畝之麥卽多獲一畝之利爲公家計少荒一畝
之田卽少欠一畝之賦而因衣食有資弗至鬻妻賣子轉徙流
亡其功德更無論矣謹陳顛末惟執事圖之

復江蓉舫

頃奉月之初四日手覆並另示各件均已誦悉晉省善後事宜

論利民以勸墾爲急言籌備則復倉爲先惟勸墾銀兩非實在
給散有地無力暨認墾受佃農民則經費悉爲虛擲故全仗地
方官實心實力將老荒新荒與夫有主無力墾作之地截清界
限分別造冊庶爲之請豁糧賦則有主名頃畝可徵無虞大部
挑剔爲之墾荒招佃給以農具籽種之費弗至程効虛懸第所
注意者如此第派委各員與地方官能否照此清理本管府州
能否悉心督率實亦毫無把握然使依式辦理縱有不實不盡
尚不至貽民累若其顛倒紛紜全無頭緒必至官民胥困受害
無窮每一念及輒爲煩慮來函所言投稅過割更名諸弊前於
擬定清查荒地章程時亦經議及嗣因此項事端刻旣澈底搜

查地方官分應自行清理無待煩言茲經閣下痛陳其隱似應由上發端查辦俾免異時之患容卽商同芝岑方伯切飭地方官將此層彙入清荒章程中核實辦理期無偏廢還倉一事近擬以奉撥五十萬金專辦此節庶幾浩蕩天恩一律普沾不至茫無實際前擬發府州生息者蓋恐紛紛買穀或至糶價踊貴且爲貧民之累而又未便日久存儲故擬暫行發商冀以生息之資藉益善後之款茲台端旣以省南典商不願多領息款自可作爲罷論應俟部款領到先儘省南之沿邊州縣酌量買穀還倉倘有所贏再儘各府縣分別酌填大約撥款到齊至多不過三四十萬被災動撥倉穀與奏豁災前民欠倉穀爲數亦

不過百餘萬石此時三成規復其一下餘二成仍當酌畱釐金或每年截畱地丁數萬以十年八年爲率逐漸爲之似旣無傷公家元氣而後來者亦有要領可尋沿邊與府縣地方倉儲稍有所蓄脫有意外之虞或可恃以無恐尊諭與弟適相符合容卽商同芝翁方伯定計辦理至復倉數目似應就額設數目與現存數目爲準不過參以因災動撥之數期於利用安生與交代原無干涉蓋動撥者有動撥之報銷復倉者有復倉之案據彼此無論影射若拘於交代之案假於額設一萬倉穀因災動放二千原虧八千就冊存論之應有所存就倉儲計之絕無所蓄故應仍就額設現存之數酌量買補若因災動撥實數要亦

不可不知俾有酌奪希卽查照辦理可耳告諭各文眞誠樸直
當可感動神佑至張軍門馬隊如目下尙未到卽請函述弟
意催令撥隊進紮便爲搜捕狼隻永虞蟲孽已淨刻旣交秋似
可無慮解州渠堰得閣下親自相度必能節省經費唐裕歸公
之款尊處詳到當卽據以轉咨並爲加函奉告請勿系念省北
牛隻以瘟疫盛行須白露後方可南下現在所恃以種麥者全
憑馬牧一路採買望囑玉山迅爲料量如果易買卽於找發一
萬之外由省局再發三四萬金亦無不可凡事期於便利而已
不必拘拘前議也星使之款悉依所定數目辦理應以何時撥
解乞閣下便中請示遵辦書局捐款各處若已定數望告馮令

安爲勸辦邇日省門天氣早晚已可服袴不卜閣下臂瘡已否痊愈事煩公冗諸望節勞

再前函正在封發間適展月之初七日覆函誦悉一切所買牛隻民間需用甚殷猶以隨到隨撥爲要玉山前擬分撥道路便利可行業經批准分潤平陽之說似可毋庸卽以口外之牛分給平陽可也一切概由閣下就近與玉山刺史酌奪辦理弟不爲遙制俾免誤事牛價專用現錢之議係採用汾州林守稟詞茲來函旣以專收現錢亦有流弊則莫若銀錢聽民自便而爲銀爲錢皆不出馬牧批稟十兩之說辦理其十千一說本係函商之詞卽可存而不論至大牛九兩小牛五兩此語如果的實

又恐多滋弊混不如明定章程大牛十兩小牛減半於分撥時
卽將大牛若干頭小牛若干頭文載明晰將來照數收帳可耳
鹽務展綱減課之詳已於十一日敘奏拜發其致農部公函當
飭文案委員擬稿核發請勿系念

復江磬舫

昨奉惠函並示底清摺一扣誦悉種種蒲解所屬於月初均已
得有透雨在秋成雖無大益而種麥亦尙不遲具見至誠感格
澍應昭然旣慰且佩惟該處糧價陡漲僅豫省一綫來源買穀
還倉之舉又不得不酌奪情形辦理免令壟價居奇致爲小民
之累前言擬籌百萬巨款買穀者係指通省而言如河東所屬

不宜多買則於豐收之處多歸幾成倉穀歉薄之處少歸幾成倉穀亦無不可要之曰後終須買補目前祇取便民弟與芝岑方伯均無成見也玉山收到續撥牛款後已有詳稟前來所請在盧氏設局採買與分給委員文札以重事權各節均已批准照辦既不掣肘當可日起有功北路牛隻刻亦陸續起解並聞來源頗暢易於採購已商同様方伯卽曰找解銀四萬兩俾得隨買隨解用資耕作至本年錢糧定憲災重之處祇令完納一忙候稟覆到齊與虞鄉批准之案一全彙奏免致枝枝節節爲之轉令朝廷目爲瑣屑民間昧所遵從若催令所稟蟲災等語有關考成將來不以此層敘入奏內請毋系念狼患近無所

聞鼠災途次猶劇不卜收割以後可以斷絕否趙城雹災已據
王令稟報近日似此者南北州縣皆有天災未已良用惴惴裁
減攤捐一事關繫州縣全局操方伯刻已籌辦大約不難於議
裁而難於籌抵俟有定局當以奉告鹽務一事如有議准消息
卽乞函知弟處藉釋懸盼本年三場平靜土子尙不及五千人
兩試使亦極和平體恤難得之至弟以善後事煩急須料量已
於二十一日出闈至強派外省車驛一事官吏藉以省錢丁胥
藉以折費當飭局通行禁革以蘇民因此外如有應辦事宜閣
下情形熟習耳曰極周儘可函示辦理弟無不踴躍從事也

致李中堂

直境秋雨過多積水至今猶未全退行者且苦泥淖農民之不能耕種可知我公憂樂天下萬目災黎諸煩焦慮幸湖北新漕三萬碩之請已荷恩俞若可敷衍冬春賑濟屆及新麥登場貧民謀食較易當可悉返耕鑿之舊尚希珍衛玉躬用慰中外之望是所企禱此間善後事宜勢如亂絲斷非急切所能就理現在清釐荒地爲之辦理蠲緩以紓目前之困一面籌款買穀稍資儲積雖難歸還全額而有顆粒存倉於緩急不無所補至於買牛馬以便農民籌耕具籽種以勸屯墾明知事多費窵地博人稀程効非易要當勉竭所盡期將此項恩賞五十萬與各省尾捐悉以分潤晉民若夫彌縫缺略以及休養生息則在

後來之賢非國荃所敢知矣再晉省州縣缺累過重故於吏治
不甚講求近迭奉 詔令減裁州縣攤捐實於此間積困有不
謀之合刻擬將應減者減應裁者裁如幸有成將來官斯土者
或不忍以一己之有餘更窶百姓以不足子遺之民或有豸乎
種闢盡抱用敢略陳顛末仍求教益爲幸國荃自二十一日扶
病出闈曰來服藥調理外感較輕而足疾仍劇瞬屆武闈斷非
跛倚所能臨事不得已於初九日拜疏請假一月奏派芝岑方
伯代辦武闈如假期以內所患託庇有瘳亦斷不肯遽作抽身
之想惟公知我定蒙鑒照

致吳子健中丞

前月初旬疊雨無休度登籤掌晉省自五月初九以後始連獲
暢雨遠近普形深透秋禾皆可布種但冀三伏之內暢雨無休
庶幾晚穀豐收猶可藉資補救刻下天心似有轉機惟善後事
宜千條萬緒一時苦難著手最要如招墾荒地及籌發籽種採
買耕牛並填還倉穀之類種種需費不貲而捐項既停來源已
斷真有一籌莫展之勢昨曾具摺願天恩將推廣新捐暫
展半年至冬月底停止奉旨交部速議具奏聞大部諸公亦
頗能原諒謂此爲萬不獲已之舉但不知所議如何果如所請
或可將此次賑務勉強敷衍以謝災黎而畢已責否則竭蹶情
形正難逆料矣尊處代辦督捐業經依限截止一切局務計已

清理就緒所有在事應獎各員務祈飭局詳請鈞核迅予出奏
俾早邀 奨敘其沐裁成耳

復沈幼帥

接誦環章並披手翰渥叨獎注感荷難名承惠示減徵疏稿讀之剴切詳明如出陸敬輿蘇子瞻兩公之手此等經世之文所關於國計民生者至深且遠公之德被蒼生而功施社稷當與江河萬古矣曷任欽服之至此間三伏之內陽雨應時秋禾極爲芃茂可望豐收惟善後一切需費不貲計不獲已因有展捐之請卒經部駁幸荷 聖慈准給部款二十萬金又撥十省協餉三十萬共成五十萬金之數昨已恭備函牘奉達冰案諒邀

鈞察現擬派員請領部款先儘墾荒之用餘如籽種牛具等項
斷非三十萬金所能分布顧此外別無羅掘之處尙不識將來
作何敷衍恩之茫無定算所撥蘇省之三萬金仍祈逾格闢垂
迅飭完解俾濟要需感戴高雲始終靡旣

復黃沛階

江天遠隔秋水興思忽奉棨雲快愉竟日弟撫茲雁澤又屆蟾
圓慙虛度夫駒光實難藏乎鳩拙載頌副殷殷以晉災頻仍
轉機幸得善後雜艱不憚三思之勞示以六條之準始終條理
畢貫其中往復循環言皆有物此由平日勤求民隱實心實力
以相將故所策洞中機宜有井有條而不紊豈惟鄙人欽佩晉

民實利賴之矣六條中所及如牛具籽種之宜採購荒田開墾
之宜召募業主有無之宜清查錢糧徵收之宜分別蠲緩升科
之宜酌量皆已飭善後局認真辦理惟流民之散而之四方者
遠拋鄉井猶未周知晉中現在情形正擬設法招撫而閣下已
代爲籌及今日之患在有地無人多一農民即可少一曠土誠
如尊論卽當妥籌趕辦至無主田業預立承認限期一條猶爲
確論墾荒之難正惟此無主之業無人承佃耳不予以期限則
旣不肯承種猶致啟爭端江南兵燹後未能一律開墾前事
者卽後事之師自當以之爲鑒耕牛必購自他方已派員分赴
口外秦豫各處採辦酌撥災區籽種亦由官量爲散給惟鐵筋

則不須往外採買晉中本係產鐵之區雖遭荒歉民間農器尙易製辦可無須官爲備給耳勸農本係急務但各屬均遣委員會辦轉慮有累地方現在均已責成牧令卽由牧令選擇公正紳士勸辦招墾諸務以期實濟地畝分別老荒新荒其原係老荒不能開墾者擬請奏豁新荒地畝則飭地方官力爲招佃統俟三年後再升科則能否辦有成效刻尙毫無把握自維才力已竭思慮未周幸承指示精詳實匡不逮亦惟勉圖補救於萬一而已

復唐泉伯

頃披手翰並公牘各件藉聆種切晉捐承賢裔梓鼎力籌勸集

款甚鉅三晉遺黎靡不感激至賢喬梓之實力實心不憚勞瘁拯晉民於顛危晉中方伯廉訪同深欽佩匪獨一人倚賴已也兩湖分局旣多耳目原難周知分局自便私圖者容或有之防弊固不可不嚴然終不可以不肖之心測人苟非實跡昭彰則不必深究可也甯鄉分局王銘應有無受賄情弊尙屬一面之詞查該員前開請獎之單並無喊王二員之名卽所開各名亦概未准獎敘則此事似不必過於聲張或轉囑他人先行緘詢如無其事固佳卽有私相授受之處亦必自行了安該員係殷實之家諒知自愛閣下如能設法曲全之則更妙矣否則恐其未繳之項難以全繳也至湖南藩署已經咨請密查了此過節

更爲周到兩湖分局欠款自應亟行催繳湖南已咨中丞並咨
會方伯以與心心相印也至於湖北則祇咨會王方伯當可爲
力兩院似可不咨以首座向於尊處先有過節未必肯出力耳
三處公牘三件特寄尊處卽由尊處酌送可也笛樓之項已交
于一百金下少之數渠若未能補交敝處定必歸款不過少需
時日耳湘中各分局雖不無浮收之弊亦不必過事苛察祇求
於公事無礙則可相安無事矣賢喬梓委曲周全之衷荃已深
悉卽方伯廉訪亦無不其相體諒決不以無端浮言而致吹求
也捐款墊解不少方伯亦已洞悉但期各局早爲截數報解不
至久負尊處即可收局刻下祇以催繳尾欠爲要至於無稽之

言與無據之事切望置之不論不議之列爲要

復吳健帥

中秋後一日接奉惠書啟聆種切並悉前泐數函迭呈台覽諸
承摯愛感佩難名周守天麟爲其母請旌一事昨接大咨知已
具題到部足見表揚幽潛之盛德不獨周守銘戴而已至尊處
代辦賑捐凡在事出力各員無不始終勞勸善體鈞懷而責守
獨蒙逾格保獎嚴守亦允另賜栽培皆因鄙人一言曲從其請
感謝之私較身受者爲更切也刻下太原及東北各屬晚穀以
次登場微嫌陰雨過多易致霉爛若得從此暢晴以便收割歲
事可期中稔至如省南平蒲一帶又因秋來缺雨依舊歉收民

間倍形困苦雖經籌發耕牛籽種令及時墾播以待來年而以撥款未至不敷購辦惟先擇極貧之戶趕爲散給其勢未能周徧其餘各處應辦善後事宜亦已次第圖維無如頭緒太繁款項太絀一時尙無眉目自慚蹇拙於災區毫無裨補當茲時勢略有轉機而棘手情形反覺日甚一日若非仰仗仁隣力爲傾助更不知作何竭蹶聞此次協款已費盡籌措獲二萬金先行解濟餘一萬兩亦由甯局隨後趕解是蓋我公胞與之念饑溺之思久而彌篤故於此地子遺情狀儼若曰懸心目間而必欲使之出溝壑而登衽席然後爲快真令人嘆服無已

致李捷帥

前以晉省荒歉之餘善後款無所出仰蒙天恩發給部款與各省指項五十萬兩俾應切需當經飛咨冰案並函陳一應爲難情形度均郵呈聰聽查晉省山多地少僅東南數郡之地尙宜耕作而此二三載之中遭逢百年未見奇災亦以東南各郡縣爲最烈本年麥收歉薄夏雨愆期秋禾補種者不過十之三四縱有所獲除去人工籽種計亦無大贏餘遑能顧及來年麥種與牛隻農具之需更何能將已荒之田設法墾復悉反耕鑿之舊故弟前函以買耕牛製農具散籽種三者爲善後切要之務否則荒穢之地固不可治成熟之田仍將就廢流亡之眾示無歸期全活之民又將離散三晉爲朝廷丁賦差優之省且

近在畿右如不竭力挽救稍有因循此後之糜爛何堪設想第以款無可籌上煩宵旰之綢繆遠累仁隣之協撥撫衷至爲惶歎現在買牛委員均皆踴躍購覓查荒州縣亦皆造冊賈呈惟盼貴省協款早日賜撥到晉便可續買耕牛一面飭備農具籽種將現查荒地招佃墾種宿麥爲來年春收張本庶三晉遺黎弗至終成溝瘠而大君子頻歲救災恤隣之誼亦如造塔者必合其尖成此圓滿功德斯則下走百拜以求弗自知爲顏厚者也尙求鑒許其愚飭司設法勻撥刻速匯解來晉藉應切需不勝盼禱之至

復長鶴亭

秋間肅復寸箋藉攄蕪惱計塵英昧頃披惠翰備聆壹是晉省
荒祲連年今歲秋收又形歉澆公私益加困乏前因賑撫及善
後諸務需費浩繁而來源已竭遂萬不得已而作展捐之請不
意又爲部駁僅准撥款五十萬金俾資敷衍而地方應辦事宜
如籽種牛具及募佃墾荒糴穀還倉之類約略計之必須一百
五六十萬金始堪分布近來拮据萬狀楮墨不能備述以此應
解尊處協餉屢承來命竟不能勉效涓滴之助想麾下軫念災
區早已深悉其苦如此後事機稍轉必趕將所欠餉項設法補
解以副台囑而釋歉衷目前羅掘俱窮剜醫無術實有一籌莫
展之勢前函已將方命之故略陳大概茲復瑣敘一二以明區

區非有心膜視者尙祈曲予涵亮無任慙感

復李申夫方伯

夏間附寄一函託子健中丞轉呈適台旌遊浙此信由豐園主人遞寄幸達典籤杭州山水本佳名賢所至湖山益爲增色承示遊杭之樂益徵高人韻士逸興遄飛以視勞碌塵寰力盡筋疲樹建毫無者苦樂笑音霄壤遙企芳蹤欣羨無量舊令尹去新令尹來乘除者宦途之常而入幕上賓則聞風傾仰已久其告而信從相得憾晚也固意中事知陳榻非徐孺子莫下奚待鄙人之一言乎然而揄揚盛美以爲仁賢先聲則亦遠地知交所當爲之事新令尹履浙卽當附陳執事恩澤在湘路人皆知

新令尹亦是部民其相敬早在不言之中此次借重之殷可無
煩區區之上貢也上海暢談之約亟思一遂良覲而此間善後
事宜初行開辦略有端緒去計雖決不得不勉力暫支數月自
前月請假憇息一月刻下仍擬銷假視事棧豆固不足戀要當
於明春乞假養疴耳駝背子癸亥年一夾之後至今心悸此次
復出自暫噤聲不發一言明知於事無濟亦不肯以殘疾之身
試於危險之地高明白當格外見諒謀士與令威一鼻孔透氣
反以踐踏毛蛋爲政事所必不可少之舉公論果安在哉天下
之可憂者甚多且大固不僅毛蛋一隅耳

復衛莊游

接誦手書備贍偉論東坡謂季常精悍之色見於眉宇而豈山中之人哉今於閣下亦然越南之亂業已盪平惟李揚才漏網未獲此等人才爲盜不足而謂可用爲南屏則似明季之招降鄭芝龍張獻忠輩徒自貽禍耳易銀以金之說現無此議惟尊意謂自宋以來以銀爲市而天下始弱當思所以變通之法不幾於止沸揚湯抱薪救火耶當漢唐之末天下未嘗用銀何嘗不貧且弱元明之盛天下未嘗廢銀何嘗不富且强大抵國之強弱隨時代爲轉移此有數焉存乎其間初不繫乎用銀與否况數百年來朝野以銀爲便雖聖人復起不能廢而不用亦猶井田封建之必不可復也而謂一舉士麻克遂能以易金之謀

使中國甘受其錮此雖三尺童子知其不然可毋深慮來書謂
鄙人不喜考据非也所惡於考据者爲其穿鑿附會於經中大
旨毫不相關而徒取一二疑難字句互相辨駁如兩造紛爭使
人莫知曲直之所在甚或拾唾餘而自矜創獲逞臆見而力詆
前賢古人說經何曾有此斯最惡之耳如閣下所示能發前人
未發之蘊不惟有益於經義而又有裨於 朝典雖匡鼎解頤
不過如是何弗樂聞之有邇來名山司鐸胸次高朗著述必多
有何得意鴻篇無惜以時見示俾祛鄙塞爲荷省門近况如常
善後事宜粗有眉目堪釋錦系

復丁稚帥

奉讀復書備勞蓋注感納滋深晉省頻年放賑倉穀動用一空現雖儘銀百萬專辦此款尙不能填還舊額然已力盡於此別無補苴之法至於牛種一切猶目前急務近來陸續購辦所費不貲亦僅能擇極貧之戶先爲散給其勢不能周徧蒙公軫念災區於萬分拮据之中特將此地協款迅予撥解頃據李委員士珍來稟已全數領交票號匯兌來晉仰見我公饑溺之忱體恤備至弟與三晉士民均受無涯之賜珠蛇環雀未足言酬惟有永銘心版而已來諭凡事祇求其在己可謂片言扼要卓識不磨弟雖驚庸謹當書紳從事第恐平日忠君愛國之心未能見信一事不如人意以之者遂如蝟毛而起而顧踣卽隨其後

欲求如執事以大樹之撼聽之蚍蜉實亦難得耳丹翁頗有書
來其於地方利弊仍講求甚切尊論方之古大賢誠不爲過將
來必有朝命強之出山其精神興趣似可爲蒼生一起特未
甚合時宜屈指當代老成碩望亦惟與執事如驥之斬也風便
時惠箴砭俾祛蒙惑幸甚

復李中堂

捧讀鈞復敬承臺是賑務報銷已於前月二十二日出奏仍劃
出尾款歸入善後案內部中若無異議年底當可核覆刻下籽
種牛具均已散完惟倉穀價昂不能不暫緩羅買查晉中州縣
多係丁糧合徵獨有二十餘處向未歸併貧民深受其累當此

奇荒之後流亡未復丁銀猶不易徵現在派員趕緊清查擬將
丁額概歸入地糧之內如丁多糧少勢難全併者卽將所餘丁
糧奏請豁免此事必須年內辦成庶來歲上忙時地方官有所
適從而通省丁地不分皆歸一律矣然使有地之家代納丁糧
必不心願當多費一番唇舌耳

復劉毅帥

十月迭佈兩函次第想登籤閣冬至前三日接誦九月二十四
日惠翰祇承壹是李揚材就擒越南軍務業已叢役西陲邊境
經大軍兩次痛勦之後醜類盡除俄人膽寒伊犁收還諒不敢
多方要挾獻地歸俘可操左券從此西南又安全力專注海防

金湯鞏固眞大局之幸也關隴地震之異雖屬罕聞以今日大勢論之中外靜謐朝政清明地象如此示警或者將有豐年之兆歟天恩高厚振撫兼施被災之區重有更生之慶自古未有修德行仁之世而不能彌患於無形者以理度之固無庸深慮也晉省東北各屬秋收中稔幸有轉機而省南平蒲一帶秋成歉薄仍盼來歲麥收以蘇積困弟憇息一月勉力銷假視事明知衰朽之材無補時局特以善後諸務甫經就緒不得不竭躉綱繆如款項應手次第並舉晉民或可旋定而安集之也執事以一身繫中外之安危前聞侯相有幫辦北路軍務之請長城正深倚重惟櫛沐勤勞時殷鄙念邊風嚴冽尚祈隨時珍

衛是所至禱

復畢東河

開丞觀察回晉詢悉在都叩謁時曾蒙垂問晉中辦賑始末伊
略陳梗概卽荷獎飾再三聞之愧悚卽讀副札雅意殷勤謂應
將頻年章奏文移及一切籌辦章程薈萃成書俾將來有所考
證猶想見大君子利濟之忱曷任欽感晉省疊遭荒祲實從來
未有之災顧賑費至千有餘萬幾竭天下之力以拯一方之民
而數年以來徒見流亡布路井邑成墟尙何荒政之足傳於後
弟忝膺艱鉅旣未能熟籌於始又不獲補救於終五夜捫衷方
用內疚更何敢妄自矜炫貽譏大雅惟念朝廷軫恤災黎發

帑徵漕 恩施屢沛各鄰省代籌捐款協助餉金始終不遺餘力凡見諸章奏文移者皆足昭 聖主之仁鄰封之誼誠不可不敬爲登諸志乘以示將來至於此次捐輸自士大夫以至商賈小民及閨閣婦女莫不慷慨傾囊以資賑用誠古今創見之事有以見我 朝德澤入人之深故因一隅之災而眾情鼓舞激發如此夫人心之美風俗之厚有識者每以卜社稷之長遠此則可以流傳用備觀感者也 一俟善後事宜稍有頭緒志局彙書成帙卽當送呈鈞覽冬間望雪孔亟幸月之初旬祥雲迭被遠近優霑來歲麥收可期豐稔或地方從此漸有轉機堪以告紓蓋注

復江蓉舫

頃奉上月二十四日手復誦悉種切減引裁費一節若以現在掣運情形斷不能不設法頂奏至不便形諸詳牘情節並請切實代擬函稿分致農部諸公以期事之有濟萬勿以此煩慮也金和帥處現有催餉信來詞旨絕不操切茲再擬將今年萬難撥解情形及前提牛價歸還匯號欠款均係賬運銀兩並非道庫實有存餘可以代司庫彌補舊欠詳細函達或可信無他故芮城應徵下忙正賦因該處民情困苦已由弟處徑札萬令一面停徵一面詳免以便集案入告至虞鄉糧事據其詳批則上忙本已蠲免若據此次奏案則上忙又應補徵雖朝三暮四

終歸徵收一忙惟民力旣屬拮据與其作無益洎呼不若作一
筆勾銷之爲直捷卽擬札行該縣照芮城辦法嘗不至再虞轉
轄矣運城因金觀察捐湊賑款添設粥廠最爲便利窮民之政
深以爲慰丹老捐款積穀值此米價踊貴旣無可買之穀又乏
承領之商似祇可存庫從緩舉辦旣經據情陳達想丹老亦必
以爲然京餉咨批刻已核辦不至有誤程限尙乞紓念爲幸河
東瞻望雪澤省城亦然擬冬至節後竭誠申禱如獲澍應來年
事機方可順手弟勉於上月二十一日銷限祇以風寒迫人雜
病太多足猶未愈仍未能出而見客善後事宜紛如亂絲偶疎
檢點卽不免有舛誤靜養二字自非弛厥負荷萬難做到叨承

厚愛感謝無似念堂太史昨已泐寄復言片奏亦鈔咨矣

致葆芝岑方伯

現在節候已逾冬至省外雪澤寥寥且乾風時作陽不潛藏來春不卜是何景象弟心至爲煩慮因思買穀還倉一事原以備儲積而禦凶荒弟慮經辦之員從中漁利故不得不立定限制查晉省穀價每石值價銀一兩以內者卽屬便宜近日外間穀價其在一兩以內之處并不多見故弟於此等批稟無不照准一則晉省頻年荒歉卽苦素無囤積所有採買之糧價值居其一運費居其九以故竭天下財力皆銷磨於腳運之中不得不引爲至戒二則天心難測人力之可盡者諸宜未雨綢繆俾免

臨時竭蹶矧三冬亢旱已形各處倉儲空匱猶須事先準備方
爲妥善但不知穀價一兩以內者共報若干處業經批准及時
採買者其若干處刻已核發價銀者若干處尙在稟請未發者
若干處務希閣下立卽飭局查明數目倘有價在一兩以內尙
未給銀之案卽請閣下酌定銀數於三日以內或交該州縣來
差領回或卽派委員管解期於年內一律入倉旣令民間銀米
交易有益下忙萬一春饑亦可稍有所恃如過此年關開年糧
價必漲如無冬雪其漲猶無限量將來買自國戶之手喫虧更
大故不得不通籌並計想閣下智珠在握猶必以弟言爲然諸
希鑒照爲幸否則旣經奏明以銀百萬買穀萬一需用而無顆

粒可提弟與諸君子皆難當言路之詰責也能無凜然

復江蓉舫

連奉上月二十八日惠函誦悉壹是鹽務減課各層如果悉如
所請花費在所弗惜但此等重務似皆六堂畫諾而行未必主
之胥吏所以必須預爲要約者不過防此輩從旁挑斥至誤乃
事然費至巨萬必須見有的憑方可交易而退此等譸張爲幻
情形想慧心人必已早審所處矣此件約以十五後拜發詳尾
云云頃據方牧呈閱尊函當於奏內照此更正妥洽所擬大農
函稿事理明豁之至卽詞氣亦尙不傷激切容卽分致六堂與
正奏一同繕發其丁丑綱奏銷一案已於上月二十四日咨覆

如果幸無後言卽作罷論倘再駁詰遲延之故卽如尊意以駁改稽時詳請咨覆杜此需索法門諸乞紓念爲幸兩岸引銷暢旺自係閣下竭力整頓之効至開年京餉刻已預籌五萬金候解弗至詒誤正供均深欣慰靈石山多地瘠被災亦重如苕人觀察果能摑資湊賑於貧農大有裨益至虞平永芮汾吉垣沁人民流亡十已六七若不亟思援手必將靡有子遺昨已商同芝岑方伯將此等被災最重州縣請免六七兩年下忙一忙以紓民力如情形有類此者併歸此案辦理在國家之所損有限而閭閻之受益已多並以奉告南路牛隻玉山已採辦竣事第以前患牛瘟不無損耗玉山辦事至爲實心批令來春再由

善後請領數萬金續買耕牛以補各屬之不足協餉從緩之奏
昨奉 批迴戶部知道在大農不無後議然有此輾轉總可緩
至來年春間矣省外仍無雪澤刻擬設壇續禱弗知能如願否
狼鼠之患近聞比前更甚昨已飭發賞補告不准令州縣開銷
尙希費神督飭辦理是所禱切